

修訂日期: 2004/10/14 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 19, No. 983A

原始資料: 蕭鎮國大德提供, 北美某大德提供

No. 983A [cf. Nos. 982, 984, 985]

佛說大孔雀明王畫像壇場儀軌

開府儀同三司特進試鴻臚卿肅國公食邑三千戶賜紫贈司空謚大鑒正號大廣智
大興善寺三藏沙門不空奉 詔譯

佛告阿難陀。若諸世間所有災禍逼惱。刀兵飢饉亢旱疾疫。四百四病憂惱鬪諍。
及八萬四千鬼魅嬈惱有情。所求世間出世間勝願多有障礙者。皆由無始已來貪愛無明。
虛妄分別三毒煩惱。不了實相積集不善。感招如是種種災難。

阿難陀是故我今為彼讀誦佛母大孔雀明王經者。及一切災厄眾生。復說畫像法及
建立道場供養儀軌。若依此法轉讀是經。一切災難皆得消除。所有願求隨意滿足。阿
難陀若有苦惱災難起時。或彼國王及諸王子大臣妃后。及苾芻苾芻尼善男子善女人等
。為除災故。或於王宮或於勝地。或於清淨伽藍或隨本所居宅舍。依法淨地掘深一肘
。除去瓦礫地中穢物。填滿淨土築令平正。其土本淨却用填之。若土有餘其地殊勝。
應泥拭清淨建立道場作五肘方壇。高四指量三重布位。或以彩畫或用五色粉成。於內
院中心畫八葉蓮華。於蓮華胎上畫佛母大孔雀明王菩薩。頭向東方白色。著白繪輕衣
。頭冠瓔珞耳璫臂釤種種莊嚴。乘金色孔雀王。結跏趺坐白蓮華上。或青綠花上。住
慈悲相有四臂。右邊第一手執開敷蓮華。第二手持俱緣果(其果狀相似水葍)左邊第一手
當心掌持吉祥菓(如桃李形)

第二手執三五莖孔雀尾。從佛母右邊右旋。周匝蓮華葉上。畫七佛世尊。從微鉢尸如
來乃至釋迦及慈氏菩薩等。皆頭向外坐各住定相。至西北角第八葉上。畫慈氏菩薩。
左手執軍持右手揚掌向外作施無畏勢。又於蓮華葉外。內院四方畫四辟支佛。皆作佛
形頂有肉髻亦住定相。又於四隅畫四大聲聞。從東北隅畫阿難陀。次東南隅畫羅睺羅
。次西南隅畫舍利弗。次西北隅畫大目犍連。皆著捷陀袈裟偏袒右臂。此皆中院。次
第二院畫八方天王并諸眷屬。東方畫帝釋天王。執金剛杵與諸天眾圍遶。次東南方畫
火天。左手執軍持右手施無畏。與五通苦行仙眾圍遶。次南方畫焰摩天王。執焰摩幢
。與焰摩界鬼眾圍遶。次西南方畫羅刹王執刀。與諸羅刹眾圍遶。次西方畫水天。持羈
索。與諸龍眾圍遶。次西北方畫風天王。執幢幡。與諸持明仙眾圍遶。次北方畫多聞
天王。執寶棒。與諸藥叉眾圍遶。次東北方畫伊舍那天。執三戟叉。與諸步多鬼眾圍
遶。此皆是第二院。次第三院從東北隅。右旋周匝畫二十八大藥叉將。各與諸鬼神眾
圍遶。及畫宿曜十二宮神。次第三院外周匝。用香泥塗飾。布以荷葉。葉上安置供養
食食所謂乳麋酪飯食果子等。皆以阿波羅爾多明王真言。加持香水散灑。布列四邊供

養。及以諸漿沙糖石蜜石榴蜜漿等而奉獻之。壇上散白色花於四角置酥燈四盞。四門各置二淨器滿盛香水。於壇東安佛母大孔雀明王像。其畫像法如前畫壇。唯不安界道即是。中院聖眾燒沈香和香等供養。東方天眾應燒白膠香而為供養。南方天眾以紫鑲芥子及鹽相和燒之供養。西方天眾以酥和安悉香燒之供養。北方天眾應燒薰陸香而供養之。持誦者於壇西面。敷茅薦為座。或坐卑脚床子。嚴飾經案置於壇前。以諸香花供養經卷。應如是布列。轉讀經者可三人五人乃至七人。更替相續晝夜不令經聲間斷。要在絕語言。除數內一人明閑教法。呪師指擣取與祇對。作法結印啟請賢聖。餘人但當至心讀經。唯在遍數多。慇重發願依三十七尊禮懺。三時或六時。其道場或一日或二日三日乃至七日。一切災禍悉皆殄滅。除不至心。轉經者或在家人或是出家人。每日澡浴清淨著新淨衣。初起首時對道場前。虔誠一心禮諸聖眾。先以印契真言。依教請召一切佛菩薩及諸天眾。如法供養。說所求事慇懃啟告。願垂加護。普為一切苦難眾生。廣發大願。然後結跏趺坐以塗香塗手。先結三昧耶印。二手右押左外相叉作拳。直豎二中指頭相拄即成。結印當心誦三昧耶真言七遍真言曰。

唵三(去)

麼(上)野娑怛饅(三合)

即以此印加持自身四處。所謂心額喉頂頂上散印。

次結金剛鉤菩薩印。

准前三昧耶印。以二頭指屈如鉤向身招。不間斷誦真言七遍。普召諸佛菩薩諸天鬼神一切聖眾真言曰。

唵嚩日[口*朗](二合引)矩尸(一)

阿(引)羯(重呼)茶微羯茶娑嚩(二合引)訶

由結此印誦真言請。召一切聖眾不違本誓皆來赴集。

次結阿波羅爾多明王印。用結地界結方隅界。二手右押左內相叉。直豎一中指頭相拄。即以印頂上右旋三匝。隨心遠近便成結界誦七遍真言曰。

唵虎嚕虎嚕戰擎里摩蹬岐(去)娑嚩(二合引)訶(引)

次結普供養一切賢聖印。

二手右押左相叉合掌。十指互交上節即成。結印當心誦七遍頂上散印真言曰。

曩莫三滿多勃馱(引)

南(一)薩嚩佗(引二)欠(平三)喎娜[十/(阿-可+辛)/木](二合)帝(四)娑[叵*貢](二合)囉咄(馨異反引)[牟*含](五)詭詭曩劍(六)

娑嚩(二合引)訶

由結此印及誦真言。能於一一佛菩薩諸聖眾前及於無量諸佛剎土。成辦一切廣大供養。

次結佛母大孔雀明王印。

二手右押左內相叉。二大指二小指。各直豎頭相拄即成。結印當心誦真言七遍。
如前以印加持四處頂上散印真言曰。

唵麼庾(引)囉(引)訖蘭(二合引)帝(引)

娑嚩(二合引)訶

次捧香爐奉獻啟請。告白聖眾說所求事。如是依法請召供養已。然後起悲愍心。
為拔濟眾生苦難故。轉讀此經。每日中前換諸供物。應結阿波羅爾多明王印誦本真言。
。以印頂上左旋一匝。暫解其界換供養已。即如前次第再迎請結界如是依教供養轉讀
此經。所有災難亢旱疾疫。鬼魅厭禱惡毒災障。種種苦難必得除滅。所有祈願無不遂
心。我已廣說畫像壇場供養儀軌竟。若不辦如是塗畫壇場。或有急速災難至。可隨自
力分於一淨處。以瞿摩夷塗地作一肘方壇。隨其大小。磨白檀香塗作圓壇。九位中安
佛像。及以三五莖孔雀尾豎於壇上。隨時燒香散花乳糜酪等供養聖眾。但虔誠一心轉
讀此經。或一遍或三遍乃至七遍。或一日或二日。一切厄難悉得消除。所有祈願皆得
圓滿。

爾時阿難陀聞佛世尊。為當來世一切苦難有情。說此讀誦大孔雀明王經法。頂戴
受持禮佛而退。

佛說大孔雀明王畫像壇場儀軌(卷)